

原
书
缺
页

畏廬筆記

林琴南先生箸

馬公琴

楚人謂墓曰公琴。而馬生粵人。其父廬墓。生悲其父所爲。故自號曰公琴。誌哀也。年十八。已領鄉薦。革命後。生年三十餘矣。入都欲得官。顧無薦引之者。厭城市紛糾。遂移居夕照寺。寺莫詳其自始。在廣樂門內。荒陋沮洳。車行如墜深谷。寺中尙饒花木之勝。生下榻其間。一日再食。均出諸老僕之手。長日靜坐。讀楞嚴蓮華諸經。用自排遣。去年春半。生微病不出。夜睡弗帖。起而挑燈。門忽自闢。有一老人。年約七十以外。髯長及腹。衫袖極修廣。類道人裝。入揖言曰。無介唐突。當不見罪。生知其非人。顧生平深入佛海。已悟四禪。水火無動。寧復畏鬼。遂

起肅客。客曰：足下此來，圖官來乎？生曰：吾書生無遠志，得以筆墨自活，爲願已足。客曰：君長於考據乎？生曰：如何？客曰：考據之用，神矣。清儒之最純實者，亭林、梨洲外，獨數閻百詩。然百詩生平一物不知，深以爲恥。適人而問，少有寧日，所箸書深切詳明，可云儒林中之魁碩。次則惠半農，博通六藝，九經諸子、史漢之學，所箸易禮諸說，皆確不可易。又次則江艮庭、王西莊、錢竹汀、王蘭泉、江慎修、戴東原、盧抱經諸老，名聲均若日也。果得其一偏，亦可以邀取名卿貴要之賞。識胡一寒至此，偃臥荒寺之間，無人過問也。生笑曰：閻惠諸老，吾無其學，鄙意終以高郵父子爲不欺。先生奈何一不之及？若今日之考據家，抱阮氏之皇清經解爲枕中秘，更將河間之提要鈔撮而強記之，拾前人糟粕，爲疊床架屋之言。雖生平專集高可隱人，閱之令人頭痛。吾雖清貧而死，決不向此故紙中乞。

憐矣。客曰：然則金石家亦不弱。生曰：是愈下矣。鐘鼎之文，周秦之碑，多古文籀篆分隸諸家之字。然立碑之所，往往淪廢于山崖墟莽之間。原揭不可必得，得之又多翻印，然求得一紙，已不貲矣。但以天發神讖而論，可辨者但有數字而已。人已珍如秘笈，由三國推及周秦，爲事更難。且鐘鼎一物，非盛富極貴之人，而又好古者，決不能有。即使有之，字仍不識，其又何用？劉原父博極羣書，而韓城鼎銘爲原父所得，與精熟篆籀之太常博士楊南仲讀之，尙不了了。自惟王九月下至三壽是利，原父共闕二十二字不識。此二十二字，賈逵許慎多無其說。矧近代古書更稀，乃貌爲淵博，用驚愚昧，又何爲者？近人鼠目寸光，一見金石家所書多奇字，所記皆古碑中或能辨鐘鼎完缺之一二字，自以爲心得，試問卽識此一二字，又何爲者？近人固有藏帖累數十箱，殆鐘漏一歇，子孫立時

售賣都盡。如翁覃溪筆迹。徒供骨董家爲居奇之貨色。于學問之道。一無所裨。吾決不之爲矣。客曰。良然。良然。方今金石家無幾。有一二存者。自命甚高。似一精金石。百凡學問。無所不統者。滋可笑也。雖然。由考據而入古文。如某公者。從遊不少。亦可云今日之豪傑。且吾讀其文。光怪陸離。深入漢魏之域。子雲相如。不過如是。足下苟折節與交。沾其餘瀋。亦足知名于世。生笑曰。此真每下愈況矣。某公者。擄擄餽飣之學也。記性可云過人。然其所爲文。非文也。取古子之文。句一一填入本文。如尼僧水田之衣。紅綠參錯照眼。又患其字之不古。則逐一取換。易常用之字以古字。令人迷惑怪駭。不敢質問。但驚曰博。私詫其奇。夫古人爲文。焉有無意境義法。可稱絕作者。漢文之最宏麗者。無如封禪文。典引。及劇秦美新。然細按之。皆有脈絡可尋。卽三都兩京之賦。中間亦有起伏接筭之

筆某氏但取其皮。不取其骨。一味狂奔。余恆擬爲商舶之打貨。大包巨籠。經苦力推跌而下。貨重而艙震。又益以苦力之呼噪。似極喧騰。實則毫無意味。于是依艸附木者。尊如亞聖。排斥八家。並集矢于桐城矣。此種狂吠。明之震川。固遭其阨。試問弇州晚年。何以屈服于震川。天下文字。固有正宗。不能以護法弟子之納喊。及報館主筆之揄揚。卽能爲蜉蝣之撼也。客曰。然則詩人亦不足爲乎。生曰。詩人可爲也。以詩自市於世。則不可爲。詩人本有二病。一病相阨。一病相阿。相阨則各蓄成心。相阿則陰樹黨援。樹黨者。防己之不傳。於是汲汲立社。招集同類。一篇旣出。甲尊乙曰。後山復生。乙推甲曰。魯直再世。此尙爲實力攻詩者也。又次則無腔之留。信口而吹。葳苓與洩渤同投。嬌施合鹽嫖並坐。一篇之出。動卽千言。聽之如老百歲之唱探親。聲聲入竅。然實不能辨其句讀。然亦譁

贊高才。盛推作手。此尙云文人之忠厚也。一至相阨。則罵詈聲喧。文章價賤矣。世無秋帆。亦無稚雨。一字千縑之索。恐無此愛士之人。吾不爲也。客曰。然則吾子之才敏。試入法政學堂。執業數年。粗明法律。科員不難致也。生大笑曰。難哉。法政之書。本出倭文。顛倒糾纏。讀之雖曉。新律既行。而精於舊律者。瞠然莫解。所謂恣新律家所言。無可駁詰。於是捷足者。高據刑憲之席。不經薦寵。卽爲不明律意之人。銓司無權。其能近身於刑曹。非司法者鑒賞其才。終身無躋叙之一日。吾屏棄祖國文字。而習此顛倒糾纏之刑書。又須用前清運動之力。仰面看人。其上者。得推事。次則科員。日與律師相對。以無情之面目。據可笑之刑章。吾寧死不出此矣。客曰。然則出爲諸侯之客乎。生曰。將軍幕府。必用曾習武備之人。巡按廉僚。又爲親戚故舊所有。吾生貧薄。與將軍巡按無親。揖客不重。撫

接無人。余只宜槁死矣。客喟然曰。高哉先生。語已拂袖而起。風動燈搖。門亦遂闔。意來者其靈狐也。

畏廬曰。此人太罵世矣。考據及詩文家。原無益於世。然尙爲國粹。精者自精。雖百口之詆。不能掩也。若僞文僞詩。卽不必詆之。亦將隨風埃而滅。唯所論律家一節。尙有可采。蓋新律一行。罪人之幸不少矣。吾鄉人得一穿窬之盜。盜曰。勿告官府。小人願上其贓。主人將釋之。而巡士不可。不可誠是也。殆一入官。官不得左證。而盜亦力辯其冤。立時釋去。嗚呼。爲盜而求證。是明見其盜之入。而故不言。待其竊後。始追取之。而證方可得。且盜陰類也。必在無人處行竊。欲得其證。百年無信讞矣。新律一端。其弊如此。其餘暗無天日者。指不勝屈矣。

吳琯

吳瑯者。閩之安溪人。少年美風姿。能書。十五入邑庠。其翁大賈也。病於甯波。生聞耗。附杉木之舟赴寧。省其父。船近温州洋。盜舟三艘來如箭疾。旣而審爲杉舟。無可劫。卽問誰爲船主人者。船人以瑯年少可欺。卽指之曰。白裕而隅坐者是也。賊渠進曰。書生。吾家甚邇。不苦茶飯。幸從我一遊。遂並其裝過其舟。時已抵暮。海色蒼茫。小舟甚簸蕩。且暈。生此時念父心切。不期失聲而哭。羣賊大笑。其穉已而易小舟。港汊甚亂。百道歧出。行一炊許。至一山村。村可百餘家。門宇相望。中有一魁碩之人。挈生手入小巷中。柴扉淨潔。有老婦應門。隨一女。郎年可十八九。髣髴甚美。生淚眼模糊。亦不之辨。旣入。老婦顏色甚善。卽曰。客子得毋饑乎。奈何穉嫩如女郎也。生自述父病。道中爲人刼質至此。而壯夫已怒目止之。勿言。媼爲之微歎而入。少須具膳。盜自以尊酒盤肉。獨酌。生所饜者。稀醢。

及鹽鼓而已。舍後卽廚次。小梯上一危樓。頗高爽。可以望遠。媼將臥具入。令宿。生再拜呼之爲母。媼亦慈祥。自言爲彭姓。子名彭豸。孔武有力。少年時以事受笞。則大怒去而爲盜於江中。有妹名六珠。頗知書。尙無良匹。恆力諫其兄。不見聽。唯豸尙知行孝。凡老身之言。匪不聽也。生至此計窮。知無可脫。卽問媼曰。彭壯士囚我至此。意欲何爲。媼曰。苟得贖金。卽可寧家。生曰。幽囚僻壤。去家遠。卽有金何從得。媼是問。媼曰。郎但作書。豸自爲致之。生卽自巾箱尋筆研。蓋翻覆凌亂。所有金錢盡去。但餘紙筆而已。生果作書與母。趣以千金來贖。媼且言但寓某處。可立得也。明日豸令生助母執炊。生入廚次。見六珠雖布素而奕奕如天人。不髻而辮。髮長委地。見生愕然。繼而微笑。生不敢仰視。紅潮被頰。愈顯其美女益心醉。時堂上集賊侶十餘人。索餐。媼女匆匆治具。令生將出。授受之間。

偶觸女手。其滑如脂。生此時念父之心。幾爲之奪。卽自拊其心曰。不孝子在患難中。作妄想邪。立時容色莊肅。往來趨走。如僮廝。多顏色亦微霽。謂生曰。汝家能出千金邪。生曰。家固非豐。然贖命之金。或不之靳。是夜衆復出。平明時得二俘歸。亦泉州人。同拘此樓。然俘頗頑健。多則械其足。不能逸。時多家尙有季父葆卿。善人也。心薄多之所爲。顧不能奪。見生玉貌而溫馴。問之。知爲諸生。則請諸多。挽過其家。請書楹聯。生素能書。揮洒自如。葆卿大悅。擬導之遁。而又不欲。歸而風雨大作。所囚之二客。乃乘猛雨震電中。越窗而去。生久不得家書。亦時時思遁。知遁且不遠。轉爲所得。將趣於禍。一夕方執炊。女來奪其吹簫。與之同坐。生起。女曰。執炊若職也。我來督爾。非受代也。生不敢校。然亦不敢側視。女曰。若家尙有何人。生曰。父病於甯波。不知母氏殷憂。將成何狀。語已淚泄。女曰。爾

獨無兄弟姊妹邪。生曰：有弟僅十歲，有姊已嫁夫。女曰：姊尙嫁夫，汝胡未娶？生噤不能答。女曰：人倫大事，試言何妨？生低首答曰：未也。女微笑以手弄其指環，自言曰：爾指纖瘦，較我尙不如何其弱耶？生仍不答。女曰：若不畏吾兄耶？汝謂吾兄爲何等人？生曰：俠客耳。女哂曰：俠乎？亦盜俠耳。老母年高，我亦無罪。如此行劇，設官軍一臨，玉石同碎。我將奚甘？生曰：天相老母，或不至是。女泣然曰：安知此禍不在眉睫？語次，豸闖然入曰：瑯汝家書至矣。果厲千金，汝脫囚矣。今夕五鼓隨吾行。吾將導爾以舟赴宵省汝父矣。生大喜，而女已掬愁於面，似有無窮惜別之思。於是匆匆食已，生卽歛足將事。豸曰：但取茵褥，他物皆留。然留者亦僅筆墨書籍而已。生亦聽之。漏上五刻，豸已入。時山村微雨，豸爲將茵褥導生出。見水際星火熒熒，則賊舟三艘停於洲尾，遂納生其中。是夕送生並以行。

剽舟甫放洋。忽聞砲聲。則巡洋之艦至。用諜言。遮之於此。砲至。立沈其一舟。舢舨爭下。兩舟不能逸。一一就禽。見生異之。生遂具告。劫質之故。中有一人。則浙西人。瑯師之友。劉先生。爲船中幕賓。力向主將言。生非盜。而主將固已釋之。卽問曰。汝從盜中來耶。生四顧。囚中已不見多。意墮海死矣。卽曰。知之。主將曰。以明日犖其穴。遲明吹角。舟師可一百餘人。登陸縛囚。及生爲導。至媼家。生告主將。媼善而女賢。主將見媼。亦頗憐之。女見生至。卽戰慄言曰。吳郎獨不能爲地耶。生曰。此事屬之主將。汝乞命於將軍。或得生。媼已叩頭流血言曰。不肯子遭官刑。不自甘。故行剽。然以犯婦之言。力止之。實未嘗殺人。然其罪固難道。死。犯婦不行剽。而女尤謹愿。乞將軍憐之。生因私告劉先生。以媼母女善狀。劉先生言之主將。得釋勿治。遂抄沒其產。可數千金。臨行。女泣送生於道。生憐之。乞其

戒指。匆匆歸。而父病亦愈。母聞女賢。乃以人迎之。夫婦稱佳偶焉。時媼亦德女年八十餘終。

紅髯大王

畏廬曰。余譯十字軍英雄記。謂當時歐亞之英雄。在英惟李卻。在回回惟沙拉定。二人而已。且此二人工力悉敵。李卻以剛。沙拉定以柔。然雅露撒冷。爲沙拉定所據。罄十字軍之力。不能奪也。又柔道之足勝剛矣。乃不知當日金風鐵雨之中。尙有一日耳曼之大英雄。紅髯大王巴巴撓沙在也。紅髯之事。甚奇。似卽今日德皇威廉第二之前身。或且古史之故留此疑團邪。或確有其事。則不敢知。踐卓翁自入平報館。爲小說近十餘萬言。今以此篇爲大收束矣。紅髯在十字軍至東亞時。年已六十有九。方以大力征服羅馬。加冕於羅馬城。王璽鏤弗

樂聲色。長日不去鞍橋。橫刀盤馬。四征不庭。諸國匪不傾服。迨十字軍大敗。衆馳書求救於王言聖陵之十字軍大燾。爲回回所折。納諸溝瀆矣。王大怒曰。鼠子敢爾。立時召集步騎。勢如山水暴發。卷甲疾趨。至雅露撒冷。隔河望見回回城郭矣。顧山雪甫消。河流猛駛。深可數丈。一時無舟。不能猝渡。王奮其長髯曰。寡人素聞是河可揭而渡。安所用舟。兒郎但視我馬首。遂力鞭其馬。渡河呼曰。不恇怯之男子。當隨我。卽躍馬入水。於是千騎騰蹕。悉從髯王。絕流而過。山水旣猛壯。河身復深。王力鞭其馬。馬爲橫流所激。立沈。王尙奮迅水中。紅髯飄於水上。刀鋒半露。而王薨矣。從行一千餘騎皆死。唯步兵未渡。則臨流而哭。忽水上雲起。咄嗟間見一教士。執十字架向殘軍言曰。爾輩哭帥之聲何高。爾王實未死也。爾輩試歸過開弗士山。其中有洞天。王假息其中。待時而醒。有巨鷹盤

旋於山峯之上。卽王醒之時。王之再來。必有驚天動地之事業。稱雄於全球。爾其待之。語竟。教士立隱。衆歸。初未知所謂開弗士者安在也。逾數百年。有牧羊者。行牧於山下。一羊脫羣而逸。牧者追羊。路窮。怪石卓立。石腹見小竇。髣髴若有光。窺之。似綠陰受日。牧者喜曰。是中艸蕃。吾羊冒入矣。遂僂而入。竇竇纔通。人盡處。忽得異境。廣殿一區。玉石爲柱。上嵌寶石無數。碧光照眼。所謂綠陰受日。卽寶石光也。殿中有玉座。假寐一紅髯甲冑之帝王。兩廂列將佐無數。皆倚槩壁間。蒙盾於膝而酣臥。牧者失聲而呼。王醒。列將亦醒。王曰。爾見山峯之上。有飛鷹乎。衆爭仰視曰。未也。王曰。然則吾王尙未至耳。衆立時釋兵復臥。鼾聲大作。牧童皇遽不知所爲。亦如夢醒。則仍臥於牧場之次。聞羣羊嚼草之聲而已。記其事者爲美國包魯烏因。余甚疑其事。將應之於今日之歐戰。某某諸友。

皆謂合天下之力。以博德人。德必敗。然德人常勝也。中國之於列國友邦耳。初無左右袒之心。唯以古書夢兆卜之。似紅髯醒時。卽在今日。而德又日耳曼種人也。在昔羅馬希臘。實尙纖緯之學。有驗有不驗。名爲哲學家。爭棄置而不言。余靜觀世變。謂養精蓄銳數十年之德國。恐列強未易當也。若以人道言之。仍以罷戰爲上。蓋各國死者。不惟精銳。而宿學之士爲多。以國家培植數十年之學者。乃聽其血膏野草。骨委荒邱。何其忍也。所願吾言不驗。全球立息烽烟。斯則大願所存。祈天以聽命者也。

莊平山

莊平山者。韶州之曲江人。生而不慧。然肥白無貧餒相。父化成。行賈於澳門。致數萬金矣。折閱都盡。所餘尙五千餘。化成感喟業敗。將歸耕。至廣州。時有廉州